

醫說

六



醫說卷第七

積

傷滯用藥不同

人之臟腑皆因觸冒以成疾病而脾胃最易受
觸蓋日用飲食稍或過多則停積難化冷熱不
調則吐嘔泄痢膏梁者爲尤甚蓋口腹恣縱不
能謹節近用消化藥或論飲食既傷於前難以
毒藥反攻其後不復使巴豆礪砂等藥止用麴
蘖之類不知古今立方用藥各有主對麴蘖止

能消化米穀如肉食有傷則非礪砂阿魏等藥
不能治也至於魚蟹過傷則須用橘皮紫蘇生
薑菓菜有傷則須用丁香桂心水飲傷則須用
牽牛芫花固不可一槩論也必審其所傷之因
對用其藥則無不愈其間輕重則隨患人氣血
以增之而已又有一等虛人沉積不可直取當
以蠟匱其藥蓋蠟能粘逐其病又可久留腸胃
間又不傷氣能消磨至盡也又有痺氣偏虛飲
食遲化者止宜助養脾胃則自能消磨不須用

剋化藥耳病久成積聚癥瘕者則須用三稜鼈
甲之類寒冷成積者輕則附子厚朴重則礬石
硫黃瘀血結塊者則用大黃桃仁之類醫者宜
審詳之

雞峯方

物能去積



廚家索粉與掉粉不得近杏仁近之則爛頃有
一兵官食粉多成積師以積氣元杏仁相半細
研爲元五元熟水下數服愈

據醫新說中有人食黃鷄子過多因食鷄子羹

遂愈

有傷粽子成積用麴末加少木香爲散鹽湯調
數日口中聞酒香其積遂散

三說
醫餘

食藥

凡人服食藥一例須用巴豆是大不然養生必
用方主張青木香元亦未是也巴豆去積牽牛
利水不可一槩用且如傷食米麵之類當用神
麴麥蘖傷肉當用阿魏氣不快當用丁木香青
陳皮磨積塊用三稜蓬朮取熱積用大黃冷積



用巴豆痰積用牽牛血積用乾漆此其大略也

更以意推之

同上

治積用藥

大抵治積或以所惡者攻之以所喜者誘之則
易愈如硃砂水銀治肉積神麴麥蘖治酒積水
蛭蚘蟲治血積木香檳榔治氣積牽牛甘遂治
水積雄黃膩粉治涎積礞石巴豆治食積各從
其類也若用羣隊之藥分其勢則難取效許嗣
宗所謂獵不知兔廣絡原野冀一人獲之術亦

踈矣須是認得分明是何積聚然後增加用藥
不爾反有所損嗣宗自謂不著書在臨時變通
也

本
事
方

擲撲打傷

墮馬

齊中郎破石病淳于意診其脉告曰肺傷不治
當後十日丁亥洩血死即後十一日洩血而死
破石之病得之墮馬僵石上所以知破石之血
者切其脉得肺陰氣其來散數道至而不一也

色又乘之所以知其墮馬者切之得番陰脉番
陰脉入虛裏乘肺脉肺脉散者固色變也乘之
所以不中期死者師言曰病者安穀則過期不
安穀則不過期其人嗜黍主肝故過期所以
洩血者診脉法曰病養喜陰處者順死喜養陽
處者逆死其人喜自靜不躁又久安坐伏几而
寐故血下洩

史記

治臂曰脫

許元公入京師赴省試過橋墮馬右臂曰脫路

人語其僕曰急與接入曰中若血漬曰則難治
矣僕用其說許已昏迷不覺痛遂僦轎昇歸邸
或曰非錄事田馬騎不能了此疾急召之至已
入暮秉燭視其面曰尚可治乃施藥封腫處至
中夜方甦達旦痛止去其封損處已白其青瘀
乃移在曰上自是日日易之腫直至肩背於是
以藥下之瀉黑血三升五日復常遂得赴試蓋
用生地黃研如泥木香爲細末以地黃膏攤紙
上摻木香末一層又再攤地黃貼腫上此正治

打撲傷損及一切癰腫未破令內消云

類說

龜獻奇方治傷折

治腕折傷筋損疼痛不可忍用生地黄一斤切
藏瓜薑糟一斤生薑四兩切右都炒令均熱以
布裹罨傷折處冷則易之曾有人傷折宜用生
龜尋捕一龜將殺患人忽夢見龜告言曰勿相
害吾有奇方可療夢中授此方

本事方

打撲傷損

打撲傷損瘀血凝滯氣因不行關竅皆不通大

便必閉壯者可服洗心散老弱者可服七聖檳榔元凡有此證須問臟腑所打處疼痛若傷處大痛大便三兩日不通然後可下前二藥若大便不閉傷處不甚猛痛則不可服宜服沒藥乳香當歸之類

醫餘

又

長安石史君嘗至通衢有從後呼其姓第者曰吾無求於人念汝有難故來救汝出一紙卷授石曰有難則用之乃治折傷內外損方書也明

年因趨朝坐馬爲它馬所蹶折足墜地又蹶一
臂折家人急合此藥且灌且裹至夜半痛止後
手足皆堅牢如未傷時方本出良方用川當歸
鈆粉各半兩鵬砂二錢同研令細濃煎蘇木汁
調服一大匕損在腰以上先喫淡粥半盃然後
服藥在腰以下即先服後食仍頻頻呷蘇枋汁
別作糯米粥入藥末拌和攤紙上或絹上封裹
傷處如骨碎用竹木夾定乃以紙或衣物包之
其妙如此故表而出之

又

汀州涇口市民陳公誦觀音甚誠慶元初出行
顛折一足忍痛叫菩薩越三晝夜夢一僧拄杖
持鉢登門問所苦陳曰不幸折一足貧無力訪
醫只得告佛僧曰不用過憂吾有一方接骨膏
正可治汝便買菜豆粉於新鐵銚內炒令真紫
色旋汲井水調成稀膏然後厚傅損處須教徧
滿貼以白紙將杉木縛定其效如神不必假它
劑也語訖僧忽不見陳亦寤如方修製用之則

愈

又

紹熙五年秋湖口人林四因日暮馳馬顛墜折一足骨斷招外醫莫肯治經旬痛甚偶一道人過門聞其聲而問故入視曰續筋接骨非敗龜殼不可此却難得要生者甚易道人曰但得殼足矣生與敗等也語訖即退林招衆醫議之皆云一足所傳多少龜殼灰可辨茲去五里許江畔一大龜身闊二尺常跼伏泥中捕而脫其殼



燒灰傳損處計其收効賢於小者百數也時已
昏暮未暇遣僕半夜後鄰室張翁者夢烏衣人
來訪自通爲江畔老龜哀投甚切云林四折足
醫欲殺吾取殼以療傷望一言救護張謝曰老
夫愚鈍如何施力烏衣云只煩丈人詣林氏諭
衆醫曰往日曾有龜傳一方於人而贖命者用
淹藏瓜糟罨斷處次將杉板夾縛定方書亦嘗
記載如更增赤小豆一味拌入糟中然後板夾
不過三日即十全安愈願翁便爲告之異日當

圖報遂去黎明張如所戒林與醫皆喜而從之

應期而驗

類編

熱葱涕愈傷指

崔給事頃在澤潞與李抱真作判官李相方以
毬杖按毬子其軍將以杖相格承勢不能止因
傷李相指拇并爪甲擘裂遽索金瘡藥裹之強
坐頻索酒飲至數盃已過量而面色愈青忍痛
不止有軍吏言取葱新折者便入漉灰火煨熟
剥皮擘開其間有涕取罨損處仍多煨取續續

易熱者凡三易之面色却赤斯須云已不痛凡
十數度易用熱葱并涕裹纏遂畢席笑語

本事方

打撲損

自然銅有人飼折翅鴈後遂飛去今人打撲損
研極細水飛過同當歸沒藥各半錢酒調頓服
仍以手摩痛處

本草
衍義

墜馬折足

定州人崔務墜馬折足醫令取銅末和酒服之
遂痊平及亡後十餘年改葬視其脛骨折處有

